



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 14
Hulyo 21, 2006
www.philippinerevolution.net


Editorial

Rebolusyonaryong hustisya para sa mga biktima ng terorismo ng estado!

Mahigit limang taon nang inilulunsad ng rehimeng Arroyo ang todo-largang gera na tinatawag nitong Oplan Bantay Laya. Mula nang manungkulan si Arroyo noong 2001, iniutos at pinabwelo nito ang todo-todong pananalakay ng AFP, PNP, CAGU, CVO at mga *death squad* sa mga kinokonsentrahang larangang gerilya at maramihang dinudukot at pinagpapatay ang di armadong mga aktibista sa larangang ligal.

Ilampung libong mamamayan na ang nabiktima ng pamamaslang, pagtortur, pambobomba, pananakot, blokeyo sa pagkain at kabuhayan, sapilitang ebakwasyon at iba pang karumal-dumal na paglabag sa karapatang-tao laluna sa mga pinaghihinalang base ng Bagong Hukbong Bayan (BHB).

Mula 2002 ay matatag na nilalabanan na ng BHB ang Oplan Bantay Laya. Patuloy ang pag-igting ng mga taktikal na opensiba ng BHB kung saan nagagapi at pinipinsala nito ang mga yunit ng AFP at PNP. Gayon na lamang ang paghadlang at paggapi ng BHB sa Oplan Bantay Laya sa larangan ng armadong labanan. Sa desperasyon, pinatitindi ng mga duwag na pasimuno nito na sina Arroyo, mga myembro ng kanyang Cabinet Oversight Committee on Internal Security (COCIS) at mga sagadsaring pasistang heneral tulad ni



Jovito Palparan at kanilang mga galamay ang pagtarget sa mga di armadong ligal na kalaban ng rehimeng Arroyo.

Ang tumitinding pagtarget sa daan-daang lider ng mga grupong *party list*, aktibista ng mga organisyong masa, tagapagtaguyod ng karapatang-tao, abogado, pari at pastor, mamamahayag at iba pa ay malinaw na tanda ng kainutilan ng AFP at iba pang armadong galamay ng estado na hanapin at gapiin ang BHB.

Hinding-hindi mapahihintulutan ng mamamayan at mga rebolusyonaryong pwersa na magpatuloy ang

Mga tampok sa isyung ito...

Paglaban ng mga anti-Arroyong grupo sa AFP at PNP
PAHINA 5

Mga doktor at nars, umaagos palabas ng bansa
PAHINA 8

Panggegera ng Israel sa Lebanon at Palestine
PAHINA 12

walang pakundangang mga pamamaslang at pagdukot nang hindi naparurusahan ang mga responsable sa gayong mga krimen. Sumisigaw ang mamamayan na magawaran ng kaparusahan ang mga pasimuno at operatibang nagsasagawa ng garapalang paglabag sa karapatang-tao ng mga di armadong aktibista at sibilyang populasyon sa mga larangang gerilya.

Dapat matatag at masiglang kumilos ang PKP, ang demokratikong gubyernong bayan, ang hukbong bayan at ang mga organisasyong masa, gayundin ang mga kamag-anak at mahal-sa-buhay ng mga biktima at iba pang nagmamalasakit para magawaran ng rebolusyonaryong hustisya ang mga pasistang kriminal.

Ang ibayo pang pagpapatindi sa digmang bayan ang pangkalahatang pamamaraan upang mapalakas pa ang mga rebolusyonaryong pwersa, mapahina ang mga pwersa ng reaksyon at mapabilis ang pagpapataksik sa pasistang rehimeng Arroyo.

Ang kaaway ay maaaring paduguin nang husto ng daan-daang platun ng BHB na maaaring maglunsad ng mga taktikal na opensiba sa buong bansa.

Kailangang-kailangan ding ilantad sa buong daigdig ang mga paglabag ng rehimen at mga pasistang pwersa. Dapat walang humpay na ilantad at kundenahin ng mga kamag-anak, kaibigan at organisasyon ng mga biktima at ng mga lokal at pandaigdigang organisasyong nagtataguyod sa karapatang-tao ang mga pwersang militar, pulisya at paramilitar ng rehimen na responsable sa gayong mga krimen.

Dapat hadlangan ang plano ng rehimeng Arroyo na ipwera sa ligal na larangan ng pakikibaka ang mga progresibong partido. Narapat lamang na igiit ng mga pwersa sa ligal na demokratikong kilusan ang kanilang karapatang makipagtungali sa iba pang pwersang pampulitika sa paraang ligal at pulitikal.

Gayunpaman, sa pagbwelo ng mga pasistang pakana ng rehimeng Arroyo ay dapat ding pabilisin ang mga pagsisikap na paunlarin ang kilusang lihim. May malilinaw nang senyales na binabalak ng rehimeng Arroyo na puksain ang ligal na demokratikong kilusan at monopoli-sahin ang kapangyarihang pampulitika sa kalunsuran, tulad ng ginawa ni Marcos bago niya ipataw ang batas militar noong 1972. Kaya da-

pat magpaunlad ng malakas na kilusang lihim sa lahat ng lugar para magkaroon ng epektibong daluyan ang pakikibaka laban sa itatayong lantarang pasistang diktadura at maihanda ang mga ligal na aktibistang nagnanais nang kumilos sa kanayunan at lumahok sa armadong pakikibaka.

Pero ang pinakamainam na paraan ng pagtugon sa kampanyang pamamaslang at madugong pang-iintriga ng rehimen ay ang paglulunsad ng BHB ng maririin at matutunog na bira sa mga pasimuno at operatiba ng Bantay Laya, mula sa antas ng COCIS hanggang sa antas ng mga *death squad*. Dapat magtaga ng mga espesyal na tim para manmanan at arestuhin o labanan ang mga pasimuno at operatiba ng Oplan Bantay Laya. Pwedeng magmula muna sa mga gerilya ng BHB ang mga armadong partisanong magsasagawa ng mga kontra-atake laban sa mga pasimuno ng pampulitikang pamamaslang at mga operatiba ng mga *death squad* habang tuluy-tuloy na binubuo ang mga yunit ng mga armadong partisano sa kalunsuran. Dapat ding pagsikapang rekrutin sa armadong rebolusyonaryong kilusan at bigyan ng pulitiko-militar na pagsasanay ang mga nakaligtas na biktima, mga kamag-anak, kaibigan, katrabaho o kasama ng mga martir. Sila ang may pinakamalaking pagnanais na magpatupad ng rebolusyonaryong hustisya sa kagayat at sa pangmatagalan.

Dapat samantalain ang lahat ng mga paborableng pagkakataon para parusahan ang mga pasista, laluna sa mga lugar na mababa ang antas ng kanilang pagkaalerto.

Gayundin, maibubwelta sa rehimeng Arroyo ang sarili nitong patakarang todo-largang gera sa pamamagitan ng mga operasyong sabotahe sa mga susing pasilidad militar at mga negosyo ng mga sagdsaring pasista at maka-Arroyong elemento.

AB



Taon XXXVII Blg. 14 Hulyo 21, 2006

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

Rebolusyonaryong hustisya para sa mga biktima ng pasismo ng estado 1

Pananalanta ng pasistang estado

Pagbiktima sa mga sibilyan 3

Di masikmura ang *death squad* 4

Paglaban sa loob ng AFP at PNP 5

Malakanyang, nanuhol sa CBCP 6

Suporta sa *impeachment* 7

Paghahanda sa SONA 7

Doktor at nars, umaagos palabas ng bansa 9

Kampanyang "Balik Bukid" sa Mindanao 10

Parangal kay Ka Sib-at 12

Kwento ng kontradiksyon at pakikibaka 13

Sa ibayong dagat

Panggegera ng Israel sa Lebanon 14

Dominasyon ng Israel at US sa Middle East 15

Mga Pilipino sa Lebanon, pinababayaan 15

Matatagumpay na opensiba ng BHB 16

Balita 16

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Pagbiktima sa mga sibilyan

Walang pakundangang binibiktima ng Armed Forces of the Philippines (AFP) at Philippine National Police (PNP) ang mga sibilyan hindi lamang sa kanayunan kundi pati sa kalunsuran.

Hulyo 20. Pinaslang si Madonna Castillo, 31, *secretary general* ng Anakpawis at Bayan Muna sa Isabela. Pinagbabaril siya sa harap ng Isabela State University sa bayan ng Alicia ng mga armadong lalaking sakay ng motorsiklong walang plaka. Upisyal din si Castillo ng Kilusang Magbubukid ng Pilipinas at *municipal secretary general* ng Danggayang Dagiti Mannalon iti Isabela sa bayan ng Echague.

Hulyo 19. Pinatay sa San Antonio, Casiguran, Sorsogon ng dalawang nakamaskarang lalaking sakay ng motorsiklo si Danilo Hago-sojos, 61, isang retiradong guro at lider ng Samahan ng mga Ex-Detainees Laban sa Detensyon at Amnestiya, isang samahan ng mga detenidong pulitikal sa ilalim ng diktadurang Marcos. Tiyuhin din siya ni Cong. Francis Escudero, isa sa mga pangunahing lider ng anti-Arroyong oposisyon. Kasama niya ang kanyang pitong taon gulang na anak nang siya ay tambangan.

Hulyo 17. Napatay ang isang Mangyan habang nawawala naman ang apat pang minority sa Abra de Ilog, Occidental Mindoro. Tatlo sa mga nawawalang minority ang nakilalang sina Nonoy Lauga, Maling Mariano at Saling Mariano—pawang mga residente ng Sityo Bakhaw sa Baryo Nangkaan. Ang mga biktima ay idinamay ng mga pulis at militar na tumutugis sa mga um-

ambus sa kanilang gerilya ng Bagong Hukbong Bayan (BHB) sa Nangkaan nitong Hulyo 16. Dalawa ang patay at isa ang sugatan sa mga inambus na elemento ng 408th Regional Mobile Group ng PNP.

Hulyo 12-13. Pitong mag-sasaka ang tinortyur ng mga nag-ooperasyong elemento ng First Scout Ranger Battalion sa Calinog, Iloilo. Ayon sa kanilang pahayag, basta nalamang sila dinakip ng mga sundalo at tinortyur habang pilit pinaaamin na mga gerilya sila ng BHB. Isa sa kanila, si Loreto Duerma, 26, ay hinarang ng 20 Scout Ranger na namamahinga noon sa may Barangay Masaroy. Iginapos siya sa punong kahoy, pinirirangan at dalawang oras na pinagbubugbog habang iniinteroga. Tuwing pinabubulaanan niya ang mga paratang ng militar, sinasakluban ng plastik na bag ang kanyang ulo para mahirapan siyang huminga. Ang isa pang biktima, si Jimmy Chiva, ay pinag-hahampas ng kahoy.

Hulyo 10 hanggang sa kasalukuyan. Mahigit isang platoon ng Philippine Marines ang itinalaga sa University of the Philippines sa Diliman, Quezon City. Ang mga naka-


sibilyang militar ay nagpapanggap na mga istambay at drayber upang tiktikan ang mga aktibidad ng mga progresibong estudyante at guro. Labag sa mahigit 20 taon nang umiral na kasunduan sa pagitan ng mga organisasyong mag-aaral ng UP at Department of National Defense ang kanilang presensya sa kampus.

Itinalaga ang yunit militar sa UP matapos ang marahas na pagbuwag sa martsa ng mga kabataan patungong Mendiola Bridge noong Hulyo 7. Sampung estudyante ang inaresto at 30 ang nasugatan.

Hulyo 9. Walang pakundangang nagpapatok ng mga mortar sa direksyon ng mga sityo ng Pipi, Uta at Ubel sa Barangay Gawaan, Balbalan, Kalinga ang mga elemento ng Charlie Coy ng 21st IB. Bago ito, may natagpuan ang mga nagpapatrulyang sundalo na rippleng M14 na itinago ng isang mangangaso sa isang kubo sa Sityo Ubel. Basta na lamang silang nagpapatok para palabasing nagaw nila ang riple sa pakikipag-engkwentro sa BHB.

Hulyo 8. Pinatay ng mga nagpapatrulyang sundalo ng 54th IB at 50th Special Rifle Coy si Sauyen Uyad, 18, sa Gueday, Besao, Mountain Province. Kumukuha si Uyad at dalawa nitong kasamang bata ng pantali sa palay nang bigla silang pagbabarilin ng mga sundalo. Nakatakas ang dalawang bata.

Hulyo 6. Dinakip ng mga elemento ng 63rd IB ang sibilyang si Marilyn Parane at ang kanyang dalawang buwang gulang na apo matapos magkalabanan ang mga sundalo at BHB sa Barangay Imelda, Las Navas, Northern Samar. Una'y ipinangalandakan ng mga sundalo



na dalawang myembro ng BHB ang kanilang nadakip. Kalauna'y sinabi nila na iniligtas umano nila ang maglola sa kamay ng mga Pulang mandirigma. Ang anak at manugang ni Parane ay pinararatangang mga gerilya ng BHB.

Hulyo 5. Ilegal na inaresto sina George Dugyangan at Delfin Alunday, kapwa taga-Sityo Uta, Gawan, Balbalan, Kalinga. Pinaratang silang tagasuporta at tagahatid ng suplay sa BHB. Matinding tortyur ang inabot ni Dugyangan

nang hindi niya aminin ang mga paratang sa kanya. Pinerwisyo rin ng AFP ang mga byahero nang harangin nila ang lahat ng sasakyang dumadaan sa kalsadang bumabagtas sa mga bayan ng Balbalan, Pinukpuk, Lubuagan at Tabuk at paghahalughugin ang bagahe ng lahat ng pasahero.

Hulyo. Pinatitindi ang mga pagsosona at paghihigpit sa mga bayan ng Angat, Norzagaray, San Rafael, Plaridel, Pulilan at Hagonoy sa Bulacan. Binubulabog ng mga

nagpapatrulyang sundalo ang mga kabahayan sa mga interyor na baryo ng mga bayang ito at pilit hahanapan ng mga sedula ang mga residente. Dahil dito, nagkaubusan na ng sedula sa mga nasabing bayan at maramihang nagdadagsaan na ngayon ang mga magsasaka sa Malolos para doon kumuha ng mga sedula. Sa San Rafael, pilit ipinakain ng mga sundalo sa isang magsasaka ang luma niyang ID ng SSS dahil wala itong maipakitang bagong sedula. **AB**

Mga sundalo, di na masikmura ang mga *death squad*

Dumarami ang mga upisyal at tauhan ng Armed Forces of the Philippines (AFP) na di na masikmura ang brutal at karumal-dumal na pamamaslang ng rehimen sa mga inaakusahan nitong rebolusyonaryo. Kaya naman nakikipagtulungan na sila sa mga rebolusyonaryong pwersa upang malantad at matigil ito.

Ang mga sundalong may tuwirang kaalaman sa mga operasyon ng mga *death squad* ay nagbibigay ng mahalagang impormasyon tungkol sa mga ito at sa kinahinatnan ng mga biktima ng kanilang kapwa mga sundalo. Nakatulong din sila sa pagtukoy sa mga elemento at yunit militar na may kagagawan ng mga krimen.

Malaking tulong din sa rebolusyonaryong kilusan ang pagbabahagi ng mga kaibigang sundalo tungkol sa komposisyon, taktika at *modus operandi* ng mga *death squad*. Ayon sa kanila, ang mga *death squad* ay walang iba kundi mga espesyal na *operations unit* na tinaguriang "Black Army" ng pinakamasasahol na pasista sa loob ng AFP.

Binubuo at pinatatakbo ang mga ito ng mga kumand sa antas brigada at batalyon at pinamamahalaan ng mga Area Command ng AFP. Ang mga ito ang nagtatakda ng kotta at target ng mga brigada at batalyon. Ang pagbubuo nito ay pinamamahalaan mismo ng pinakamata-



as na kumand ng AFP at ng Cabinet Oversight Committee on Internal Security (COCIS) na direktang nakapailalim kay Arroyo.

Sa antas batalyon, tuwirang pinamamahalaan ng S2 (*Intelligence Officer*) ang pagbubuo at operasyon ng mga *death squad*. Inihahanda nito ang listahan ng mga personalidad na lilikidahan na pinaaprubahan sa kanilang kumander.

Mula rito, nagbubuo sila ng isang pinagsanib na tim mula sa iba't ibang yunit ng batalyon. Pinakikilos din nila ang mga pusakal na kasapi ng CAGFU, mga notoryus na kriminal at mga nagtraydor na surenderi mula sa BHB, kapalit ang kabayaran at mga espesyal na pribilehiyo. Naglalaan ang batalyon ng kinakailangang pondo, suplay, armas at sasakyan—kabilang ang mga di rehistradong motorsiklo—para sa kanilang operasyon.

May mga pasistang heneral tulad ni Maj. Gen. Jovito Palparan at mga espesyal na yunit paniktik ng Philippine Army, tulad ng Intelligence Service Group at Military Intelligence Battalion ng Philippine Army na mayroong tuwirang pinatatakbo ng mga *death squad*. Kilala ang *death squad* ni Palparan na pinamamahalaan ng isang M/Sgt. Rizal Hilario alyas "Rollie Castillo." Bitbit ni Palparan mula pa sa Mindoro noong 2001 at kahit nang ilipat siya sa Eastern Visayas noong 2005 ang kanyang *death squad*.

Balak din ng rehimen ng Arroyo na magtayo ng espesyal pang grupo na magpapakatibo ng mga *death squad* na tutugis sa mga aktibista at lider ng mga partidong progresibo sa Metro Manila at iba pang sentrong syudad. Direkta itong pinamamahalaan ng COCIS.

Nagpapasalamat ang mamamayan at buong rebolusyonaryong kilusan sa ibinabahaging mga impormasyon ng mga sundalo at umaasang mas marami pang upisyal at sundalo ng AFP at Philippine National Police ang magpapaabot sa rebolusyonaryong kilusan ng kanilang nalalaman tungkol sa komposisyon, kinaroroonan at operasyon ng mga *death squad*. **AB**

Nag-iibayo ang paglaban ng mga anti-Arroyong grupo sa AFP at PNP

Magkasunod ang mga pangyayaring sinisikap gamitin ng Malakanyang para gipitin ang mga sangkot sa tangkang pagpapabagsak sa rehimen, makapagpakitang-gilas at palabasing ganap na naudlot na ang mga banta laban sa rehimen.

Inirekomenda na nitong Hulyo 20 ni Rear Adm. Rufino Lopez, *inspector-general* ng AFP, na sampahan ng iba't ibang kaso si Gen. Danilo Lim, tinanggal na pinuno ng First Scout Ranger Regiment (FSSR), at mahigit 170 pa kaugnay ng pagtatangka umanong maglunsad ng kudeta laban sa rehimeng Arroyo noong Pebrero 24. Inihabol ng Malakanyang at ng pamunuan ng AFP ang paglalabas ng rekomendasyon bago ang State of the Nation Address (SONA) ni Arroyo sa Hulyo 24 para mapagmukha niyang matatag ang kanyang rehimen sa harap ng pinagsanib na mga kapulungan ng Kongreso. Inihabol din ito sa bisperas ng pagtatapos ng termino ni Gen. Generoso Senga bilang AFP Chief of Staff para tabunan ang muntikan nang pagsanib ng pinakamataas na upisyal-militar sa mga pwersa ni General Lim.

Dahil walang naganap na aktwal na kudeta, nakabatay ang kaso laban kina General Lim sa mga pahayag ng umano'y mga testigo at sa bidyo kung saan idinedeklara ni Lim ang pagbawi niya ng suporta kay Arroyo.

Ang bidyo na ginawa noong Pebrero 23 ay matagal nang hawak ng rehimen, pero sikreto itong ipinadala sa midya nito lamang Hulyo 3. Nakatakda sanang isahimpapawid ito nina Lim makaraan ang inaasahang pagtatagumpay ng kilos protesta ng sambayanan para patalsikin si Arroyo, kalahok ang mga upisyal at sundalong balak sumama sa


pagkilos sa mapayapa ring paraan. Sa kabila ng pagbabawal at mga tangkang pagbubuwag ng mga rali, natuloy ang kilos protesta ng mamamayan, pero hindi ang paglahok dito ng mga upisyal at sundalo dahil bigo si Lim na kumbinsihin si General Senga at iba pang matataas na upisyal ng AFP na suportahan sila. Pinalalaki ng Malakanyang ang kaso at pinalalabas na ang planong mapayapang pag-aatras ng suporta kay Arroyo ay isa nang pagtatangkang maglunsad ng marahas na kudeta.

Samantala, itinaon din ng mga operatiba ng AFP at PNP ang paghuli sa mga elemento ng Makabayang Kawal Pilipino (MKP) sa panahon bago ang SONA kahit matagal nang minamanmanan ang mga ito.

Pinalalabas ng AFP at PNP na nakakuha sila ng maraming malalakas na riple, pampasabog at mga dokumento na nagpapakita na may plano umano ang MKP na pasabugin ang kalapit na Batasan Complex sa panahon ng SONA.

Mas maaga pa'y inianunsyo na ni Gen. Hermogenes Esperon, bagong AFP Chief of Staff na bumaligtad na si 1Lt. Lawrence San Juan na nadakip sa Padre Garcia, Batangas noong Pebrero 21 mula sa pakikipagpulong umano sa ilang pinuno ng Partido Komunista ng Pilipinas at Bagong Hukbong Bayan.

Sa kanyang pagharap sa midya, inulit lamang ni Lieutenant San Juan ang mga dati nang paratang ng Malakanyang-AFP-PNP na si dating



Sen. Gregorio Honasan at iba pang dating lider ng Reform the Armed Forces Movement (RAM) ang namumuno sa MKP at nakipagsabwatan sila sa PKP-BHB para ibagsak ang rehimeng Arroyo. Marami sa umanoy mga pahayag niya ay isinubo lamang sa bibig niya at ipinirma lamang sa pangalan niya. Sa anu't anuman, mahirap paniwalaan ang mga pahayag ni Lieutenant San Juan dahil ginawa niya ito matapos ang halos limang buwang tortyur, pagkakabartolina at pagkakait sa kanya ng mga batayang karapatan.

Sinundan ang mga pangyayaring ito ng paglalabas ng iba pa umanoy "evidensya" ng sabwatan ng mga rebeldeng militar at mga prominenteng sibilyan sa tangka raw na kudeta laban sa rehimeng Arroyo. Kabilang sa mga idinadawit sa kaso sina dating Defense Secretary Renato de Villa, dating Executive Secretary Oscar Orbos, ang manugang ni dating presidente Joseph Estrada at myembro ng angkang Lopez na si Manuel "Beaver" Lopez, ang malalaking negosyanteng sina Antonio "Tonyboy" Cojuangco (mayari ng PLDT at ABC5), si Iñigo Zobel (isa sa mga mayor na *stockholder* ng San Miguel Corp.) at Felipe Cruz Jr. (mayari ng isa sa pinakamalalaking kumpanya sa konstruksyon sa Pilipinas). Binabantaang sasampahan din ng kasong pakikipagsabwatan sa

sundan sa "AFP....," pahina 6

Malakanyang, nanuhol sa CBCP

Malawakang galit ang inani ng Malakanyang nang mabunyag ang mga pagtatangka nitong suhulan ang mga obispo para maimpluwensyahan ang tindig ng Catholic Bishops Conference of the Philippines (CBCP) kaugnay ng mga tampok na usaping pampulitika tulad ng *impeachment*, pandaraya sa eleksyon, *charter change* (chacha) at mga pampulitikang pamamaslang.

Ayon sa mga obispo, umikot sa pulong ng CBCP noong Hulyo 9-10 si Undersecretary for Religious Affairs Fatima Valdes upang mamahagi ng mga sobrang naglalaman ng P15,000-P30,000. Ngunit marami sa mga obispo ang tumanggap ng tanggapin ang suhol o kagyat na nagsauli nito. Dahil sa pananaw ng rehimen na pabor kay Arroyo ang inilabas na pahayag ng CBCP matapos ang pulong, inimbata ni Valdes ang mga obispo sa isang *"victory party."*

Pinalabas at ipinangalandakan ng rehimen na napakapaborable kay Arroyo ang tindig ng CBCP dahil ipinahayag nitong hindi kiling ang mga obispo sa pagsuporta sa pangalawang *impeachment complaint*.

Ngunit maraming obispo ang bumatikos sa pambabaluktot ng Malakanyang sa kanilang pahayag. Anila, hindi nito inaabswelto si Ar-

royo sa mga akusasyon ng pandaraya sa nakaraang eleksyon at malalaking katiwalian. Katunayan, maaari pa itong maging batayan sa pagsusulong ng mga ekstra-konstitusyunal na paraan katulad ng pag-aalsang bayan para mapatalsik si Arroyo. Maraming obispo ang nagsabing handa silang suungin ang gayong landas sa kabila ng mga pangangib na kaakibat nito.

Gayunpaman, pinuna ng ligal na oposisyon, mga progresibong pwersa at iba pang kritiko ang pinakahuling pahayag ng CBCP dahil anila ay kulang ito sa talas at nakapagdudulot ito ng kalituhan. Malinaw na sumasang-ayon ang CBCP na nagkaroon ng dayaan sa nakaraang eleksyon, bagamat ipinana-wagan lamang nito na magbitiw sa pwesto ang mga *commissioner* ng COMELEC. Binatikos din ng CBCP

ang Chacha at sinabing dapat na ituloy ang pambansang eleksyon sa 2007. Gayundin, binatikos nito ang malawakang pampulitikang pamamaslang pero ibinunton ang sisi sa mga "ultra-kanang elemento ng AFP" at hindi tahasang tinukoy ang pangunahing pananagutan ng rehimen at ng pinakamataas na kumand ng AFP. Mas masahol pa, kumagat at nakikoro ito sa kasinungalingan at saywar ng AFP tungkol sa mga pamamaslang din umano ng Bagong Hukbong Bayan sa mga sibilyan.

Sa kabila ng mga pagkukulang ng pahayag ng CBCP, dumarami ang mga obispong hayagang bumabatikos at lumalaban kay Arroyo. Pinararatangan sila ngayon ng Department of Justice na sangkot sa "destabilisasyon." Kabilang sa mga pinag-iinitan ng rehimen ang presidente ng CBCP na si Archbishop Angel Lagdameo, sina Archbishop Oscar Cruz, Bishop Emeritus Julio Xavier Labayen at mga obispong sina Teodoro Bacani, Deogracias Iñiguez at Antonio Tobias. **AB**

"AFP....," mula sa pahina 5

tangkang kudeta ang anim na obispo kabilang ang pangulo ng Catholic Bishops Conference of the Philippines na si Archbishop Angel Lagdameo.

Subalit anumang panggigipit at pagtugis ang gawin ng rehimen ng Arroyo sa mga rebeldeng militar at mga sinasabing tagasuporta nila, hindi mareresolba ang malawak na disgusto, pagpupuyos at pagkakahati sa loob ng AFP at PNP. Sa halip, sa patuloy na paglalabas nito ng "evidensya ng sabwatan" ay lalo lamang naipapakita ang inabot nang lawak at lakas ng suportang natatanggap ng mga anti-Aroymong elemento sa militar at pulisya at

ang malala nang pagkakahiwalay ng rehimen ng Arroyo mula sa napakalawak nang hanay ng lipunan, kabilang na ang ilang seksyon ng naghaharing uri.

Noon pa man ay sinasabi na ng iba't ibang tagapagsalita ng mga rebeldeng militar na ang pag-aaklas laban sa rehimen ay hindi pag-aaklas ng ilang upisyal lamang.

Ipinakikita ng mga naisisiwalat sna mga datos at sa mismong laki ng bilang ng mga upisyal at tauhang inaakusahan, tinutugis at kinakasuhan ang malawak na sentimyentong anti-Arroyo sa loob ng sandatahang lakas, laluna sa hanay ng "matitinik na pwersa" nito tulad ng Scout Rangers, Marines at Spe-

cial Action Forces.

Tahasang pagsisinungaling ang mga pahayag ni Arroyo na "solido" ang suporta ng buong AFP sa kanya. Ang totoo, napakabuwag ng suportang tinatamasa niya at nagmumula pa ito sa pinakamasasahol na elemento ng nabibiyak ngayong reaksyunaryong hukbo.

Anumang mga kabiguan ang dinaranas ngayon ng mga anti-Aroymong pwersa sa AFP at PNP ay pansamantala lamang. Hangga't hindi nahaharap ang mga lehitimong usaping kanilang ipinaglalaban at hindi nareresolba ang kasalukuyang krisis sa pulitika, patuloy silang dadami, magpapanibagong-lakas at kikilos. **AB**

Lumalawak na suporta para sa *impeachment*

Patuloy na dumadagsa ang suporta mula sa iba't ibang sektor sa pagsasampa ng kasong *impeachment* sa Kongreso laban kay Gloria Arroyo.

Pagkatapos ng pagsasampa ng ikalimang *impeachment complaint* noong Hulyo 3, marami pang iba't ibang organisasyon ang magkaka-sabay o hiwa-hiwalay na lumagda sa reklamo laban kay Arroyo. Nakatakdang ihapag ito sa Hulyo 24, araw ng State of the Nation Address ni Arroyo. Nakapaloob sa isasampang kasong *impeachment* ang mga batayan sa panawagang patalsikin si Arroyo—ang kanyang mga hakbanging diktador, mga pasistang patakaran, mga krimen laban sa sangkatauhan at malawakang korapsyon.

Kabilang sa pinakahuling sumuporta at pumirma sa panibagong reklamong *impeachment* mula Hulyo 10 hanggang nitong

Hulyo 19 ang Promotion of Church People's Response, ang pari ng San Miguel Church na katabi lamang ng Malakanyang at iba pang paring Katoliko, mga pastor at kasapi ng simbahang Protestante at mga grupong *charismatic* tulad ng Jesus Is Lord Movement ni Bro. Eddie Villanueva. Pumirma rin ang iba pang mga organisasyong relihiyoso, anim na organisasyong Muslim, mga kinatawan ng COURAGE, Migrante, Anakpawis, BAYAN-Southern Tagalog, BAYAN-Panay at 32 pang organisasyon at susing personahe mula sa Panay, Health Alliance for Democracy kasama ang ilang doktor, nars at iba pang manggagawang pangkalusugan, Citizens' Battle Against Corruption, grupong

La Salle-Ateneo, mga abugado at maraming iba pa. Pumirma din ang Makabansang Aksyon ng Taumbayan (mga tagasuporta ni yumaong Fernando Poe Jr), dalawang unyon ng mga empleyado ng National Food Authority, Katutubong Mamamayan ng Pilipinas at mga estudyante mula sa ilang unibersidad.

Sa harap ng pangungutya ng mga alyado ni Arroyo sa Kongreso na matatalo lamang ang *impeachment* dahil "kulang sa bilang ang oposisyon," idiniin nila na hindi "numero" ang importante kundi ang pagsisiwalat ng mga ebidensya upang maipakita sa mamamayan ang matatag na batayan ng pagkakasala ni Arroyo at ang dahilan kung bakit kailangan na siyang alisin sa poder. **AB**


Hakbanging panseguridad sa SONA, binatangos

Naghahabi ngayon ng mga panastikong kwento ang mga operatibang saywar ng Philippine National Police (PNP) at Armed Forces of the Philippines (AFP) upang bigyang-katwiran ang pagpapakilos ng napakalaking pwersang pulis at militar para sa State of the Nation Address (SONA) ni Gloria Macapagal-Arroyo. Nakatakda siyang magbigay ng SONA sa Batasang Pambansa Complex, Quezon City sa Hulyo 24. Plano ng AFP-PNP na magdeploy ng 15,000 pulis at 1,000 sundalo sa paligid ng Batasan, Malakanyang at iba pang estratehikong lugar. Mistulang malaking garison ang Metro Manila.

Pinalalabas ni Police Director Vidal Querol, hepe ng PNP-NCR, na may balak umano ang Bagong Hukbong Bayan na maglunsad ng mga pananabotahe sa Metro Manila kaugnay ng SONA. Katawa-tawa,

kung tutuusin, ang sinasabi ni Querol na planong dala-dalawang bibyahe patungong Maynila ang mga Pulang mandirigma para raw manggulo sa nakatakdang rali. Ang ganitong mga imbentong istorya ni Querol ay ginagamit upang bigyang-matwid ang planong magtayo ng mga *checkpoint* sa iba't ibang daan patungo sa Maynila mula sa Central Luzon at Southern Tagalog.

Kasabay nito, inianunsyo ng Bagong Alyansang Makabayan (BAYAN) na nabigyan na sila ng permiso ng lokal na gubyerno ng Quezon City para magdaos ng rali



bilang alternatibong SONA sa Ever Gotesco Mall sa Commonwealth Avenue, ilang kilometro ang layo sa Batasang Pambansa. Sa araw mismo ng Hulyo 24, magtitipon ang mga raliyista sa UP-Diliman sa Quezon City at magmamartsa patungong Batasan Complex.

Bago ito, ibinunyag at binatangos ng Bayan Muna noong Hulyo 16 ang mga "pananakot na taktika" ng PNP. Iniulat nilang pinupuntahan ng mga nakasibilyang pulis ang mga tserman ng mga barangay sa Maynila at Quezon City. May ipinakikita sa kanila na listahan umano ng mga kasapi ng BM na nakatira sa barangay at inaatasan ang mga tserman na papuntahin ang mga ito sa Camp Crame, punong himpilan ng PNP. **AB**

Umaagos palabas ng bansa

Walang rendang ipinatutupad ng rehimeng Arroyo ang antinasyunal na patakaran nito ng pag-eeksport ng paggawa. Sabik na sabik ang rehimen sa naipapasok na remitans na dolyar. Bukod pa'y nababawasan ang bilang ng mga Pilipinong walang trabaho o kulang sa empleyo. Todo-todo ang panghihikeyat ng rehimen na mangibang-bansa ang mga manggagawa at maging ang mga propesyunal, laluna ang mga nars at doktor.

Katunayan, mismong Malakanyang ang tagapag-anunsyo ng mga *job opening* para sa mga nars at doktor sa labas ng bansa. Wala itong pakialam sa mabilis at tuluy-tuloy na pagkalimas ng mga nars, doktor at iba pang manggagawang pangkalusugan at sa inireresulta nitong pagbagsak ng kalagayan ng pampublikong serbisyong pangkalusugan sa bansa, laluna sa pinakamahirap na mga komunidad. Walang pakialam ang rehimeng Arroyo kahit pa mangamatay sa iba't ibang sakit ang mamamayang Pilipino. Ang mahalaga sa rehimen ay bumubuhos sa bansa ang remitans na dolyar ng mga Pilipinong manggagawang pangkalusugan na nagtatrabaho sa ibang bansa.

Ang Pilipinas ang nangunguna sa buong mundo sa pag-eeksport ng

mga nars. Pumapangalawa lamang ito sa India sa pag-eeksport ng mga doktor, pero 12 ulit na mas malaki ang populasyon ng India kumpara sa Pilipinas. Noong 1994-2003, umabot na sa 100,000 rehis-tradong nars ang nangibang-bansa. Kalahati nito'y umalis nito lamang 2000-2003.

Sa panahon ding ito, umabot lamang sa 20,000 ang nagtapos ng pag-aaral bilang nars at 5,196 lamang ang pumasa sa Philippine Licensure Exam para maging rehis-tradong nars. Nasa 70 hanggang 85% na ng kabuuang bilang ng mga gumradweyt na nars sa Pilipinas ang nagtatrabaho ngayon sa ibang bansa.


Dumarami na rin ang mga doktor na nag-aalisan na rin—para makakita ng trabaho bilang nars sa ibang bansa. Tinatayang 4,000 doktor ang naka-enrol

sa mga eskwelahang pangnars sa iba't ibang bahagi ng bansa nitong Abril 2006. Otsenta porsyento (80%) naman ng mga doktor na ineempleyo sa gubyrno ang kumuha o kumukuha ng kursong *nursing* noong 2005. Ayon sa isang pag-aaral, lampas sa 3,500 doktor na ang nangibang-bansa bilang nars mula 2000-2005.

Dahil parami nang parami ang inieeksport na mga nars, pinapayagan ng rehimen ang walang rendang pagsulpot ng napakaraming eskwelahang pangnars na karami-ha'y mababa ang kalidad.

Mayroon lamang 40 paaralang pangnars noong dekada 1970 at 170 noong dekada 1990. Naging 251 ito noong Hunyo 2003 at umabot sa 370 noong Abril 2004. Kasabay nito, bumababa naman ang porsyento ng mga nagtapos ng *nursing* na pumapasa sa eksamen sa paglilisensya sa mga nars. Umaabot ito sa 80-90% noong dekada 1970 at 1980; 61% noong 1991; 44-48% na lamang noong 2001-2003; 56% noong Hunyo 2004; 49.7% noong Hunyo 2005 at 42.43% nitong 2006.

Napipilitang umalis sa Pilipinas ang mga nars at doktor, tulad rin ng nakararami nang manggagawa at propesyunal, dahil kulang na kulang para sa disentang pamumuhay ang kanilang kinikita. Umaabot lamang sa ₱5,000-₱16,500 ang sweldo sa Pilipinas ng mga nars at ₱9,700-₱23,500 naman ang sa mga doktor na nangibang-bansa na—halos sapat lamang para tugunan ang mga batayang pangangailangan ng kanilang mga pamilya. Samantala, umaabot sa ₱300,000 bawat buwan ang maaaring kitain ng isang nars sa US. Patuloy na nagbibingi-bingihan ang rehimen



at mga kapitalistang may-ari ng mga ospital sa malaon na nilang kahilingan para sa dagdag na sweldo at mga benepisyo.

Dahil sa maramihang panginibang-bansa ng mga nars at kakulangan ng suporta ng gubyrerno sa sektor ng kalusugan, hindi iilang pampublikong ospital ang nagsara na. Siyam nang pampublikong ospital ang nagsara sa Isabela mula 2003 hanggang 2005. Marami pang ospital sa ibang bahagi ng bansa, laluna sa mahihirap na prubinsya, ang nanganganib na ring magsara dahil sa kawalan na ng mga nars at doktor. Wala ring interes ang rehimeng Arroyo na isalba ang mga ospital at magrekrut ng bagong mga nars.

Dalawampung porsyento (20%) ng mga manggagawang pangkalusugan sa 11 pampublikong ospital ang nangibang-bansa na at di bababa sa 50% ang may aplikasyon para rin mangibang-bansa. Halos 90% ng mga nars sa National Kidney and Transplant Institute ang nagtatrabaho na sa ibang bansa. Sa Philippine General Hospital mismo, umabot na sa 150 nars o 13% ng kabuuang 1,157 nars nito ang lumabas ng bansa mula Enero hanggang Hunyo 2005 pa lamang.

Dahil sa kakulangan sa mga beteranong doktor, may ibang ospital sa Iloilo na pinagtatrabaho na bilang *resident* o regular na doktor ang mga *intern* o mga doktor na kagagradweyt at nagsasanay pa lamang. Nagreresulta ito sa pagbaba ng kalidad ng serbisyong maaaring matanggap ng mga pasyente. Kara-



Mga myembro ng TCNE, nagbitiw

Sabay-sabay na nagbitiw nitong Hulyo 7 ang lahat ng myembro ng Technical Committee on Nursing Education (TCNE), ang ahensya ng Commission on Higher Education (CHED) na nangangasiwa sa mga paaralang pangnars sa bansa.

Anang mga nagbitiw, hindi iniimplementa ng CHED ang dati nang mga memorandum ng TCNE at hindi rin pinapansin ang mga rekomendasyon ng komite dahil sa pagkiling ng CHED sa interes ng ilang pulitiko at mga kapitalista sa edukasyon. Kabilang sa mga hinaing nila ang di pag-aksyon ng CHED sa dati nang planong ipasara ang mga eskwelahang 0% hanggang 5% lamang ng mga estudyante ang pumapasa sa eksamin sa paglilisensya bilang nars. Apatnapu sa 460 eskwelahang pangnars sa bansa ang may 0% *passing rate*. Nitong nagdaang eksamen, 46% lamang sa 42,000 ang nakapasa. Ito'y dahil na rin sa pagpapabaya ng CHED sa mababang kalidad ng edukasyong pangnars. Marami sa mga eskwelahang ito ay may mga di kwalipikadong guro at dekanos. Kadalasan ay kakaunti rin ang bilang ng mga guro sa napakaraming estudyante at mababa ang kalidad ng ospital na pinagsasanayan ng mga mag-aaral. Gayundin, binatikos nila ang plano ng CHED na isama sa komite ang mga may-ari ng mga eskwelahang pangnars dahil tiyak na dadalhin lamang ng mga ito ang interes nila sa negosyo.

AB

niwan nang hindi agarang natanggap ng mga pasyente ang kailangang-kailangan nilang serbisyo kahit pa nasa kalagayang *emergency* na sila.

Sadyang pinababayaan ng rehimen ang kalusugan ng mga mamamayan. Kulang na kulang at papaliit ang pambansang badyet ng gubyrerno para sa kalusugan. Noong 2003, 1.9% lamang ang bahagi ng kalusugan sa pambansang badyet. Lumiiit pa ito tungong 1.5% noong 2004 o katumbas ng 37 sentimo bawat Pilipino bawat araw.

Wasto lamang na tuluy-tuloy na ipaglaban ng mga manggagawang pangkalusugan ang kanilang mga karapatan—dagdag na sweldo, nararapat na mga benepisyos at makatarungang kundisyon sa paggawa, tulad ng walong oras lamang na *duty* at sapat na mga ka-

gamitan sa ospital. Kailangang-kailangan ang mga ito para matamasa nila ang karampatang pagpapahalagang katumbas ng kanilang serbisyo at mapanatili sila sa bansa para tuwirang maglingkod sa naghihirap na mga kababayan.

Kaugnay nito, kailangan din nilang ipaglaban sa gubyrerno na bigyang-atensyon at prayoridad ang sektor ng kalusugan upang mapagtuunan ang pangangalaga sa kalusugan ng mamamayan, laluna ng nakararaming hirap, nagugutom at naghihikahos.

Kailangang ipaglaban ng mamamayan na magkaroon ng sapat na badyet para sa serbisyong kalusugan.

Kailangang labanan ang merse naryong patakaran ng gubyrerno sa pag-eeksport ng mga manggagawa at propesyunal at igiit sa rehimen ang pagharap sa mga suliraning nagbubunsod ng maramihang paglisan ng mga manggagawa at propesyunal sa bansa.

AB


Kampanyang “Balik-bukid” sa Mindanao

Isang matagumpay na kampanyang “balik-bukid” ang inilulunsad ng rebolusyonaryong kilusan sa loob ng konsesyon ng PICOP Resources Inc.

Ang PICOP, na nakabase sa Bislig, Surigao del Sur ay isa sa pinakamalalaking kumpanya di lamang sa Pilipinas kundi sa Asia. Nagmamamunupaktura ito ng papel at iba pang produkto mula sa kahoy. Nakilala ito sa pagkakaroon ng pinakamalaking planta ng kahoy at papel sa buong Asia. Hanggang ngayon, ito ang nag-eempleyo ng pinakamalaking pwersa sa paggawa sa Caraga Administrative Region na kinabibilangan ng mga prubinsya ng Agusan del Norte, Agusan del Sur, Surigao del Norte at Surigao del Sur.

Ang PICOP ay itinatayo noong 1952 ng malaking burges-kumprador na pamilyang Soriano na mayari ng ANSCOR, San Miguel Corporation at iba pang malalaking kumpanya sa Pilipinas. Mula 1989, inangkin na ito ng gubyrerno nang hindi na makabayad ang kumpanya sa mga utang nito sa mga bangko ng gubyrerno. Muli itong isinapribado noong 1994 at napasakamay ng malaking burges kumprador na pamilyang Bernardino na may malalaking negosyo rin sa mga minahan at pagawaan ng semento.

Malaon nang pinagbabawalan ng PICOP ang mamamayan sa lugar na manirahan at magtanim sa loob ng 400,000 ektaryang konsesyon nito. Humigit-kumulang kalahati lamang ng konsesyon ang rehistrado sa Department of Environment and Natural Resources. Sa papel, sumasaklaw lamang ito sa mga patag na kagubatan ng Bislig hanggang sa matataas na bundok ng Paisan at Agtuaganon sa hilagang-silangang Mindanao. Sa aktwal, sumasaklaw ito hanggang sa mga bahagi ng mga prubinsya ng Agusan del Sur at



Compostela Valley. Bahagi ng kabuuang konsesyon ang 40,000 ektaryang plantasyon ng mga punong kahoy. Sakop din ng konsesyon ang may 69,000 ektaryang nasasaklaw ng Integrated Forest Management Agreement na tinatamnan ng mabibilis lumaking kahoy na pang-industriya tulad ng *falcatta*. Sa buong Pilipinas, ang PICOP ang may pinakamalaking konsesyon mula sa IFMA.

Ang kampanyang “balik-bukid” ay naglalayong ibalik sa mamamayan sa lugar ang karapatan nila sa lupang inagaw ng PICOP sa loob ng mahigit 50 taon. Ang kampanya na sinimulan noon pang 1998 ay koordinadong inilulunsad sa iba’t ibang larangang gerilya sa Northeastern Mindanao Region. Bunga ng kampanyang ito, ang rebolusyonaryong kilusan ay nakapamahagi ng matatamang lupa sa mga magsasaka sa 12 bayan ng tatlong prubinsyang saklaw ng konsesyon ng PICOP.

Mula 1998, umabot na sa 15 sityo na may minimum na 20 bubong bawat isa ang naitatayo sa ilalim ng kampanyang ito. Noong una ay atras-abante ang pagbubuo

ng mga komunidad rito dahil palagian itong ginigiba ng *private army* ng PICOP na kinabibilangan ng mga pwersang Special Civilian Armed Auxiliary (SCAA).

Noong 2000, nagdagdag ng pwersa ang AFP sa lugar para palayasin ang BHB at lahat ng mga setler dito. Sa kabila nito, ipinursigi ng rebolusyonaryong kilusan ang kampanyang “balik-bukid” at lalong dumami ang mga setler—mula sa tatlo hanggang limang bubong lamang noong una, umaabot na hanggang 100 bubong ang bumubuo ng naitatayong pinakamalaking sityo. Dahil sa ibayong pagdami ng mga setler, lalong nahirapan ang SCAA at AFP na idemolis ang mga komunidad.

Bunga ng kampanya, napapamahagian ng minimum na tatlong ektarya ang bawat taong di bababa sa 15 taong gulang na may kakayahang magbungkal ng lupa. Kaya ang kabuuang laki ng lupang pwedeng mapasakamay ng isang pamilya ay magdedepende sa dami ng mga myembro nitong makapagbubungkal. Ang mga napamamahagi-

an ng lupa ay ginagawaran ng karapatang magbungkal. Hindi nila maaaring ibenta ang lupa sa iba. Kung sakaling lisanin nila ang lugar, ibabalik ang lupa sa asosasyon ng mga magsasaka, na may karapatang magpamahagi uli ng lupa sa ibang pwedeng magbungkal nito.

Inoobliga rin ng kampanyang “balik-bukid” na magtanim ang mga benepisyaryo ng mga produktong pagkain tulad ng palay, mais at gulay. Dapat din silang sumapi sa asosasyon ng mga magsasaka, tumulong sa pagtatayo ng kooperatiba ng mga mamimili at mga pangkat-tulungan at makibahagi sa pagtatrabaho sa isang bahagi ng konsepyong nakalaan para sa komunal na produksyon. Ang mga benepisyaryong natutuklasang lumalabag sa mga patakarang ito—halimbawa, yaong mga nagbenta o kaya’y nangamkam ng lupa—ay inaalisan ng karapatan sa lupa at pinaalis sa lugar. Ang ilang nagsasagawa ng maliitang pagpuputol ng kahoy ay hindi pinarurusahan subalit patuloy na hinihikayat na magtanim.

Unang ipinatupad ang kampanyang “balik-bukid” sa isang sityo sa Agusan del Sur. Ang 100 ektaryang nasaklaw ng unang yugto ng kampanya ay pinaghatian ng 60 pamilya. Marami sa mga residenteng nagpasyang tumira rito ay mga Lumad o mga setler na dati nang nagbungkal dito at inagawan lamang ng PICOP ng lupa. Mayroon ding mga pamilyang nagmula pa sa ibang bahagi ng Mindanao na pinayagan ng sangay ng Partido sa lugar na manirahan dito at magsaka. Mula noon ay patuloy pang dumami ang mga setler nang magpasya ang rebolusyonaryong kilusan na ibukas ang kampanyang “balik-bukid” sa lahat ng kwalipikadong mamamayan.

Noong una’y ang sangay ng Partido sa larangan mismo ang nangangasiwa sa paghahati-hati at pamamahagi ng lupa. Kalaunan ay

naitayo ang asosasyon ng mga magsasaka upang pamahalaan ang gawaing ito. Naglunsad ang asosasyon ng mga pulong masa kung saan pinagkaisahan ang mga pamamaraan ng pamamahagi. Pumapasok na lamang ang sangay ng Partido sa mga usapin ng komunidad tuwing nangangailangan ng tulong ang asosasyon sa pagreresolba ng ilang kontradiksyon sa hanay ng mamamayan, tulad ng mga pagtatalo sa mga hangganan ng magkakatabing sakahan, pag-uunahan sa mga paborableng lugar, mga kwesyon sa pamamahala ng asosasyong masa at iba pa.

Sa unang dalawang taon ng kampanya, palagiang sinasalakay ng *private army* ng PICOP ang naturang komunidad. Dinedemolis ng armadong *goons* ang mga bahay, pinagbubunot ang mga pananim at pinagnanakaw ang mga gamit ng

mga magsasaka. Ngunit tuwing umaatras ang mga *goons* ng PICOP, bumabalik ang mga residente sa lugar, muling itinatayo ang kanilang mga bahay at sinisimulan muli ang lihim na pagtatanim.

Naglunsad rin ng mga taktikal na opensiba ang BHB para parusahan ang AFP at PICOP sa pagpapalayas nito sa mga naninirahan sa konsesyon. Kalaunan, nanyutralisa ng BHB ang mga pwersa ng SCAA at dumami pa ang mga setler. Dahil dito, hindi na basta-basta mapalayas ang mga setler sa kanilang mga lupain.

Katunayan, mula 2002, hindi na magawang manggiba ng kabahayan at magpalayas ng mga setler ang mga pwersa ng SCAA. Ni hindi na rin nila kayang maglunsad ng sariling pag-atake at sumasabay na lamang sila sa mga operasyon ng AFP laban sa BHB. AB

Pinsala ng PICOP

Di lamang pang-aagaw ng lupa at pamamasista sa mga naninirahan sa loob ng konsesyon nito ang kasalanan ng PICOP sa mamamayan. Malupit din ito sa mga manggagawa. Sariwa pa sa alaala ng maraming residente sa lugar ang matinding gitgitang naganap noong 1998 nang hindi kilalanin ng PICOP ang itinayong unyon ng mga manggagawa at ipakulong ang 58 welgista, kabilang ang mga asawa at anak ng mga manggagawang sumama sa piketlayn.

Matindi rin ang pinsala sa kalikasan na idinudulot ng mahigit 50 taon nang operasyon ng PICOP. Ayon sa mga NGO na Philippine Working Group at Environmental Science for Social Change, winasak ng PICOP ang kabuhayan ng maliliit na mangangahoy sa rehiyon. Marami ring nangamatay na mga uri ng hayop at nangasirang punong kahoy at halaman sa kagubatan dahil sa mga operasyon nito. Nagbubuga rin ang planta nito ng mga mapanganib na kemikal na nagdudulot ng kanser at mga sakit sa baga. Umaabot na sa 72 tao ang namamatay dahil sa polusyon sa hangin at tubig mula sa PICOP.

Sa kabila rin ng pangangalandakan nito bilang pinakamalaking mamumuhunan at taga-empleyo sa rehiyon, nananatili ang CARAGA bilang isa sa pinakamahirap na rehiyon sa buong Pilipinas. Mula 50.9% noong 2000, umabot sa 54.2% noong 2003 ang naghihikahos sa rehiyon, ayon na rin sa mga estadistika ng guberno. Mula pagiging ikalawang pinakamahirap na rehiyon sa buong bansa noong 2002, naging pinakamahirap na ito makaraan ang isang taon. Nitong 2006, itinuturing na pinakamahirap ito sa buong Mindanao. AB

Parangal kay Simon “Ka Sib-at” Naogsan, Jr.

Masayahin, hindi makasarili, puno ng determinasyon at masigla sa pagrerebolusyon—ilan lamang ito sa mga ginamit na kataga ng mga kasama, kapamilya at kaibigan ni Simon “Ka Sib-at” Naogsan Jr. Maagang nag-alay ng buhay si Ka Sib-at para sa rebolusyon nang masawi siya sa isang labanan sa Sitio Mabosngot, Basar, Sallapadan, Abra noong Hulyo 7. Magdadalawampu’t isang taong-gulang na sana siya sa Hulyo 21.

Kasama siya sa yunit ng Bagong Hukbong Bayan-Agustin Begnalen Command sa Abra na napasagupa sa mga elemento ng 41st IB at magiting na nanlaban kahit mas marami ang kaaway at nasa disbentahang pusisyon ng mga kasama.

Maagang namulat si Ka Sib-at sa pangangailangan ng rebolusyon at pagbabago sa lipunan.

Isa siya sa mga anak nina Simon “Ka Filiw” Naogsan Sr., tagapagsalita ng Cordillera Peoples’ Democratic Front (CPDF) at ni Lilia Naogsan. Pagtuntong niya sa kolehiyo, sumapi siya sa Kabataang Makabayan-Demokratiko a Tignayan dagiti Agtutubo ti Kordilyera (KM-DATAKO), ang lihim na rebolusyonaryong organisasyong masa ng mga kabataan-estudyante sa Cordillera.

Noong 2002, naging kandidatang kasapi siya ng Partido. Lumahok siya sa isang programa ng integrasyon sa isang sonang gerilya at makaraan ang ilang buwan ay naghapag ng kahilingang sumapi na sa hukbong bayan. Dahil kulang pa siya ng ilang buwan bago mabot ang tamang edad ng pagsapi, ipinagpaliban ng BHB ang pagtanggap sa kanya hanggang mag-18 anyos na siya, alinsunod sa patakaran sa pagsapi rito.

Itinalaga muna siya sa isang konsolidadong erya na relatibong ligtas sa pakikipagsagupaan sa reaksyunaryong hukbo. Dahil sa kanyang kapusukan bunsod ng mu-

rang edad, may nilabag siyang mga minor na alituntunin sa disiplina at seguridad. Gayunman, maluwag niyang tinatanggap ang mga puna at mabilis na nagwawasto. Sa kagustuhang higit na makapag-ambag sa rebolusyon at sa kawalang-takot na harapin ang hamon ng kaaway, nagboluntaryo siyang maideploy sa erya ng Boliney-Daguioman-Bucloc-Sallapadan sa Abra, kung saan mahigit dalawang taon nang tuluytuloy ang matitinding operasyon ng 41st IB.

Naging mahusay na kasama si Ka Sib-at. Wala siyang inurungang trabaho—kultural, edukasyon at pagsasanay, propaganda, produksyon man o pangmilitar. Napapagaan niya ang mga gawain sa pamamagitan ng kanyang mga pagpapatawa, pagkanta at paggigitara. Ang paminsan-minsang kalungkutan ay napapawi niya sa pag-awit. Nagpakita ng potensyal si Ka Sib-at bilang upisyal paniktik at kadreng pampulitika at militar ng hukbong bayan. Naitalaga siya bilang iskwad lider at upisyal pampulitika ng kanyang yunit. Naging ganap na

kasapi siya ng Partido noong 2004. Dahil sa kanyang pag-unlad, hini-rang siyang maging kagawad ng namumunong komite ng Partido sa larangang gerilya ilang buwan bago siya namatay.

Bagamat maaga siyang nasawi at tatlong taon pa lamang siyang nakapaglilingkod nang buong panahon, ang kanyang mga ambag at alaala ay nakaukit na sa kasaysayan ng rebolusyon. Ang kanyang dakilang pagkamartir ay pinaghalawan ng inspirasyon ng mga kasamang magulang at kapatid, mga kaibigan at mahal sa buhay, mga katribo at kapwa pambansang minorya sa Cordillera, at lahat ng mga naging kasama niya sa pakikibaka.

Sa pagdilig ng kanyang dugo sa lupa ng Cordillera, daan-daang halaman ang mamumulaklak, daan-daang kabataan ang magpapatuloy sa pakikibaka at daan-daang sandata ang magpapatuloy ng pakikidigmang niyakap at isinulong ni Simon “Ka Sib-at” Naogsan, Jr., dakilang martir ng rebolusyon at kabataang bayani ng sambayanang Pilipino.

AB



Mga kwento ng kontradiksiyon at pakikibaka

Marami-rami na ang nakakikilala kay Kasamang Armando Teng bago pa man siya parangalan ng Partido bilang “huwarang komunista at pangunahing rebolusyonaryong proletaryong mandirigma” nang siya’y mamatay noong 2000 bunga ng mga kumplikasyon sa sakit na *lupus*.

Naging aktibista si Kasamang Armando sa pagbungad ng dekada 1970. Matagal siyang kumilos sa paaralan at komunidad bilang buong-panahong kasapi ng Partido Komunista ng Pilipinas bago lumipat at nagsilbi sa loob ng mga panrehiyong organisasyon ng PKP sa Maynila-Rizal, sa Bicol, sa Quezon-Bicol Zone at sa Southern Tagalog. Naging kalihim siya ng Southern Luzon Commission, kalihim ng Pambansang Kagawaran sa Edukasyon, at kagawad ng Komite Sentral, ng Kawanihang Pampulitika at Komiteng Tagapagpaganap ng Komite Sentral ng Partido. Nakilala siya bilang Ka Aryong, Ka Simeon, Ka Eladio, Ka Cleto at sa marami pang ibang pangalan sa pakikibaka sa iba’t ibang organong kinapalooban niya at iba’t ibang lugar na inikot niya.

Higit siyang makikilala ng buong rebolusyonaryong kilusan at maraming iba pa sa buhay-na-buhay na paglalarawan ng kanyang pagkatao at makulay na buhay sa pagkakalathala ng kanyang talambuhay sa librong *Armando*.

Ang *Armando* ay isinulat ng kilalang kwentista at nobelistang si Jun Cruz Reyes. Inilathala ang librong ito ng Amado V. Hernandez Resource Center at inilunsad noong Hunyo 27 sa University of the Philippines sa Diliman.

Kakaiba ang *Armando* sa karaniwang talambuhay na gusto ng mga elitista, kung saan tanging ang gustong malaman at marinig lamang ng nagpasulat ang siyang lalamnin ng libro. Hindi ganun ang talambuhay ni Kasamang Armando na naglarawan sa mga kwento ng


kontradiksiyon at pakikibaka ng isang lider komunista. Naipakita nitong “tao” si Armando na matatag ang pagtapak sa lupa. Marunong malungkot at magalit.

Umibig din at nasaktan. Higit sa lahat, masayahing rebolusyonaryo.

Magaan basahin ang libro dahil pakwento ang estilo ng pagkakasulat ng talambuhay. Ginawang parang nasa harapan o sa tabi lamang ng mambabasa si Kasamang Armando sa pamamagitan ng paglalahad ng iba’t ibang kamag-anak, kaibigan, kakilala at mga kasama.

Maraming bahaging nakaaaliw, nakatutuwa at marami ring nakatawaw. Ang lahat ng bahagi ay kapupulutan ng mga rebolusyonaryong aral. Kasama na rito ang ilang obserbasyon ni Gregorio “Ka Roger” Rosal, tagapagsalita ng PKP, na nakasama ni Ka Armando sa pamunuan ng Partido sa Southern Tagalog noong kumilos dito si Ka Armando noong 1983-85 at 1989-2000.

Aniya, si Ka Simeon ay mahusay sa pamumuno at uliran sa maraming bagay. Siya ang takbuhan ng mga may problema, humihingi ng tulong o payo. Ito ang dahilan kung bakit siya’y tinawag na “Ang Mabait”—may prinsipyangong bait kasabay ang mahigpit na paghawak sa disiplina. Ibig sabih’y lider siya na kaibigan din ng mga ordinar-



yong mandirigma hanggang ng iba pang namumunong kadre. Ngunit palagi rin niyang pinanghahawakan ang prinsipyo at hindi siya nagiging liberal. Kung may kailangang punahin, agad niyang ginagawa ito at hindi siya kailanman nag-aatubili.

Mahusay siyang magsanay sa mga kasama. Sa pagtuturo’y binibigyan niya ng pangunahing halaga ang pag-unawa ng kasamang sinasanay at ang pagpapabwelo sa pag-unlad nang hindi naman napipilit ang kasama.

Maraming mga kwento sa libro ang makapagbibigay ng mga praktikal na gabay sa pagkilos ng mga aktibista, organisador, kadre, Pulang kumander at mandirigma, at maging sa mga masugid na mag-aaral ng kasaysayan at lipunan ng Pilipinas. Ayon sa may-akda, “Bawat kwento tungkol sa kanya ay lagging kakabit ng istorya ng nagku-kwento. Ngayong tapos na ang kanyang buhay, naririyon pa rin ang mga naiwang alaala. Ang kanyang buhay ay hindi na sa kanya. Minana iyon ng mga kasama. Buhay ang diwa ni Armando.” AB



Matinding panggegera ng Israel sa Palestine at Lebanon

Walang pakundangang pinaigting ng Israel nitong nagdaang dalawang linggo ang pambobomba at pamiminsala nito sa Palestine at Lebanon—mga bansang kanugnog nito sa timog at hilaga—sa layuning padapain at wasakin ang mga bansang ito at igiit ang dominasyon nito at ng imperyalismong US sa buong Middle East.

Isinasangkalan ng Israel sa kasalukuyang mga pagsalakay nito sa Palestine at Lebanon ang pagkakabihag ng mga gerilyang Palestino sa isang sundalong Israeli noong Hunyo 25 at sa pagkakabihag din ng mga gerilyang Hezbollah sa dalawang sundalong Israeli noong Hulyo 12. Binalewala ng Israel ang inialok ng Palestine at Hezbollah na pagpapalaya ng kanilang mga bihag kapalit ng pagpapalaya sa mahigit 1,000 Palestinong detenidong pulitikal at tatlong myembro ng Hezbollah na nakakulong sa Israel. Sa halip, kagyat na naglunsad ang Israel ng opensibang militar.


Mula Hunyo 25 ay pinag-ibayo ng Israel ang pag-atake nito sa Gaza Strip, na siyang pansamantalang kabisera ng Palestine at lugar ng himpilan ng Hamas. Umabot na sa 85 mamamayan ng Gaza Strip ang pinatay ng mga Israeli, karamihan mga sibilyan. Winasak ng mga bomba mula sa mga eroplanong Israeli ang maraming gusali, kabilang na ang mga tanggapan ng gubyrno ng Palestine at ng Hamas, pati na ang mga sentrong komersyal at kabahayan doon.

Mahigit 320 Lebanese—karamihan sibilyan—ang namatay sa walang habas at araw-araw na pambobomba mula noong Hulyo 12. Tina-target ng Israel di lamang ang mga base ng Hezbollah sa katimugan ng Lebanon at sa hangganan ng Lebanon at Syria, kundi maging ang Beirut (ang pambansang kabisera) at

iba pang mga lunsod. Nagbibingi-bingihan ang Israel sa panawagan ng mga inaatangeng bansa at ng UN na itigil na ang agresyon nito sa Palestine at Lebanon at humarap sa negosasyon.

Gamit ang mga *helicopter gunship*, mga *warship* at *fighter jet*, pinasabugan ng Israel ang mga estratehikong pasilidad kabilang ang mga paliparan, daungan, tulay, lansangan, mga *cellsite*, upisina ng midya at iba pang imprastruktura sa transportasyon at komunikasyon, mga planta at linya ng kuryente, mga gusali at maraming kabahayan sa Lebanon—pawang mga pasilidad pansibilyan na sa ilalim ng internasyunal na batas ay bawal na targetin ng mga atakeng militar. Nilusob na rin ng mga tropa at tangkeng Israeli ang Beirut. Lalong lumakas ang loob ng Israel na paigtingin ang agresyon nito dahil sa isang linggong palugit na ibinigay dito ng US na pulbusin ang Hezbollah.

Mahigit na sa kalahating milyong Lebanese ang napilitang lumisan sa kanilang mga tahanan. Daanlibo ring mga dayuhan ang



nagsilikas na sa bansa at mas marami pa ang nagkukumahog makalabas. Kabilang dito ang mahigit 30,000 Pilipino na galit na galit sa mabagal at kulang na mga hakbangin ng gubyrno ng Pilipinas para iligtas sila. Pinakamalaking ebakwasyon ito mula pa noong Ikalawang Digmaang Pandaigdig.

Samantala, bilang ganti sa mga atake ng Israel ay nagpalipad ang Hezbollah ng 100 *missile* sa loob ng 24 oras sa hilagang bahagi ng Israel na ikinamatay ng 25 Israeli, kabilang ang 12 sundalo.

Sinagupa rin ng mga gerilyang Hezbollah ang mga sundalong Israeli na lumusob sa teritoryo ng Hezbollah sa katimugan ng Lebanon. Napatay ng mga nagtatanggol na gerilya ang pito mula sa mga umaatakeng sundalo kaya napilitang umatras ang mga pwersang Israeli.

AB

Paggigiit ng dominasyon ng Israel at US sa Middle East

Mula nang maitayo ang Estado ng Israel noong 1948 sa pamamagitan ng panggegera at pang-aagaw sa lupa ng mga Palestino, walang tigil na nitong ginigipit at ginegera ang Palestine at Lebanon.



Mahigpit na kaalyado ng Israel sa mga panggegera nito ang gubyernong US. Magkasabwat ang US at Israel sa layuning mapalawak at mapahigpit pa ang kontrol nila sa Middle East, laluna sa mga rekursong langis.

Kalahating siglo nang nakikibaka ang mga Palestino para maibalik ang sarili nilang lupa at makapagtayo ng independyenteng estado. Tuluy-tuloy na naglunsad ang mga Palestino ng armado, pampulitika at diplomatikong pakikibaka na unti-unting nagbunga ng mga tagumpay. Noong 2005 ay pormal na tinapos ng Israel ang okupasyon nito sa Gaza Strip sa Palestine, at sa taong ito ay nahalal ang unang parlamento ng Palestine.

Ang Gaza Strip ay isang 40 kilometro pahaba at 10 kilometro pahalang na lupa ng Palestine na inokupa ng Israel hanggang 2005. Bagaman pormal na nasa ilalim ngayon ng kontrol ng Palestinian Authority, kontrolado pa rin ng Israel ang buong hangganan nito at palagi pa rin itong pinapasok ng Israel.

Sa loob naman ng 22 taon (1978-2000), sinakop ng Israel ang katimugang bahagi ng Lebanon, ang rehiyong pinagbabasehan ng grupong Hezbollah.

Ang Hezbollah ay isang armadong pulitiko-relihiyosong organisasyon ng mga Lebanese na nakabase pangunahin sa katimugang bahagi ng Lebanon. Isa ito sa mga pangunahing pwersang lumaban sa okupasyon ng Israel sa timog Lebanon noong dekada 1980. Mahigpit din itong sumusuporta sa pakikibaka ng mamamayang Palestino laban sa okupasyon ng Israel sa Palestine.

Palagian ding pinanghihimasukan ng US at Israel ang eleksyon sa Lebanon sa pagsisikap na makapagtalaga rito ng gubyernong maka-Israel.

Sinusuportahan ng gubyernong US ang panggegera ngayon ng Israel sa Palestine at Lebanon. Inuupat din ng US na idamay sa gerang ito ang Syria at Iran—na kapwa tinuran ng US na bahagi ng “sentro ng kasamaan.” Kamakailan ay paulit-ulit na binantaan ng US na gegerahin ang mga bansang ito sa hangaring mapaluhod ang mga ito tulad ng ginawa ng US sa Iraq.

AB

Mga Pilipinong OCW sa Lebanon, pinababayaan

Grabeng pagpapabaya ang kulang at usad-pagong na mga hakbang ng rehimeng Arroyo para tiyakin ang kaligtasan ng mahigit 30,000 Pilipinong naiipit ngayon sa gulo sa Lebanon. Malaking mayorya ng mga Pilipino roon ay nagtatrabaho bilang mga katulong at taga-pag-alaga at marami-rami sa kanila ang inabanduna na ng kanilang mga among nagsilikas na patungo sa ibang lugar.

Hulyo 12 pa sinimulang bombahin ng Israel ang iba’t ibang bahagi ng Lebanon subalit Hulyo 20 pa lamang iniutos ni Arroyo ang pagpapalikas ng mga Pilipino roon.

Taliwas dito ang kagyat na ebakwasyon ng mga mamamayan ng US, United Kingdom, France, Italy at Australia. Di hamak na mas mahirap ngayong isakatuparan ang pagpapalikas dahil sinimulan na ng Israel na magpadala ng mga tropa at tangke hanggang sa Beirut, kabisera ng Lebanon. Naghuhudyat ito ng pag-igting ng armadong labanan sa bansang iyon at paglaki ng peligro sa mga naiipit na Pilipino.

Sa kabila ng napabalitang kautusan ni Arroyo na simulan na ang ebakwasyon ng mga Pilipino, dadalawandaan pa lamang sa kanila ang naiiklas ng konsulado. Ito’y dahil wala pang dumaaring na upisyal na order sa kanila mula sa Malakanyang at wala ring ipinadadalang pondo para maisagawa ang malawakang pagpapabakwit.

Itinatanong ngayon ng mga nag-aalalang kamag-anak ng mga manggagawa sa Lebanon kung saan napunta ang bilyun-bilyong pondong sinisingil ng Overseas Workers Welfare Administration (OWWA) at Philippine Overseas Employment Administration (POEA) sa mga OCW at dapat nakalaan para sa ganitong mga *emergency*.

Kinukwestyon din nila kung bakit hindi ngayon magamit ang limpak-limpak na pondong hawak ng Malakanyang para sa pagpapalikas. Anila, matindi ang panghihikayat ni Arroyo na magtrabaho kahit sa mga peligrong bansa ang mga manggagawang Pilipino para makapagpadala ang mga ito ng remitans na dolyar na pansuhay sa kanyang bangkaroteng rehimen. Pero labis niyang pinababayaan nito ang mga OCW kapag nangangailangan na sila ng tulong.

AB



3 armas nasamsam sa ambus ng BHB sa Mountain Province

TATLONG malalakas na armas ang nasamsam ng mga Pulang mandirigma sa ilalim ng Leonardo Pacsi Command nang ambusin nila ang mahigit 70-kataong tropa ng Bravo Coy ng 54th IB at ang 50th Special Rifle Company sa Mt. Madagem, Tamboan, Besao, Mountain Province noong Hulyo 7. Kabilang sa mga nasamsam ang isang M203, dalawang M16, 18 magasin ng M16, isang magasin ng M14, 785 bala ng M16, siyam na bala ng M203, tatlong *ammo pouch* para sa M16 at limang pak na naglalaman ng dokumento at iba pang kagamitan.

Limang elemento rin ng kaaway ang napatay kabilang ang punong upisyal ng tropa, at tatlo ang nasugatan. Walang kaswal-ti sa hanay ng BHB.

Mga aksyong pamarusa, inilunsad

DI bababa sa dalawang sundalong kabilang sa Military Intelligence Group (MIG) ng AFP ang malubhang nasugatan nang salakayin ng mga espesyal na operatiba ng Venerando Villacillo Command (VVC) ng BHB ang kanilang *safehouse* sa Centro Madella, Quirino noong gabi ng Hulyo 14. Kabilang sa mga nasugatan si Capt. Larry Echorre. Ligtas na nakaatras ang BHB.

Bago ito, isa ring ahenteng paniktik ng 502nd Brigade ng Philippine Army, si T/Sgt. Nicomedes Gerardo, ang pinarusahan ng VVC sa Barangay Dilgoneza, San Agustín, Isabela noong Hunyo 18.

Sa Leyte, inambus ng mga Pulang mandirigma ng Mt. Amandewin Command si Ronald Muertigue, aktibong ahente ng Intelligence Service of the AFP (ISAFP) at despotikong panginoong maylupa. Isinagawa ang pamamarusa noong hapon ng Hunyo 8 sa bayan ng Leyte-Leyte. Napatay din ang badigard ni Muertigue nang manlaban ito. Nasamsam mula sa kanila ang dalawang .45 pistola.



Welga sa Nissan Motors, nagtagumpay

NAGTAGUMPAY ang limang-taong welga ng mga manggagawa sa Nissan Motors Phils Inc. nang iutos ng Korte Suprema nitong Hunyo 21 na ibalik sa trabaho at gawaran ng karampatang mga benepisyo ang mahigit 140 manggagawang pinatalsik noong 2001.

Nagwelga noong Oktubre 21, 2001 ang mga manggagawang kasapi ng Bagong Nagkakaisang Lakas ng Nissan Motors Phils. Inc (BANAL-OLALIA-KMU) upang tuligsain ang *unfair labor practices* ng maneydsment tulad ng *illegal lockout*, iligal na suspensyon at pangwawasak at pakikialam sa unyon.

Sa loob ng limang taon, di natinag ang mga manggagawa sa kabila ng paulit-ulit na mararahas na tangka ng Department of Labor and Employment at maneydsment na buwagin ang kanilang piketlayn. Dumanas sila ng iligal na pang-aaresto at detensyon, pananakit, pagbuwag sa mga pagti-tipon at paniniktik.

Ang Nissan Motors Phils Inc. na pag-aari ng Taiwanese na si Jack Wu ay matatagpuan sa Laguna Technopark, Sta. Rosa, Laguna.




Ilitaw ang mga dinukot sa Bulacan—Korte Suprema

INIUTOS ng Korte Suprema sa AFP nitong Hulyo 19 na iharap sa korte sina Sherlyn Cadapan at Karen Empeño, mga estudyante ng University of the Philippines, at ang kasama nilang si Manuel Merino na dinukot ng mga sundalo sa Hagonoy, Bulacan noong Hunyo 26. Ang kautusan ay tugon ng korte sa petisyon para sa *habeas corpus* ng mga magulang nina Cadapan at Empeño.

Pinangalanan sa kautusan sina Maj. Gen. Romeo Tolentino, kumander ng Northern Luzon Command; Gen. Jovito Palparan, hepe ng 7th ID; Lt. Col. Rogelio Boac, kumander ng Task Force Bulacan; isang Lieutenant Samson; at isang Arnel Enriquez. Nakasaad rin sa kautusan ng Korte Suprema na dapat ipresenta ng militar ang tatlong biktima sa Court of Appeals sa Hulyo 24.

Bago ito, nagpalabas din ng resolusyon ang University Council ng UP (konseho ng mga propesor at iba pang guro) noong Hulyo 12 para igiit ang pagpapalitaw sa mga biktima.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 14
Hulyo 21, 2006
www.philippinerevolution.net


Editorial

Rebolusyonaryong hustisya para sa mga biktima ng terorismo ng estado!

Mahigit limang taon nang inilulunsad ng rehimeng Arroyo ang todo-largang gera na tinatawag nitong Oplan Bantay Laya. Mula nang manungkulan si Arroyo noong 2001, iniutos at pinabwelo nito ang todo-todong pananalakay ng AFP, PNP, CAGU, CVO at mga *death squad* sa mga kinokonsentrahang larangang gerilya at maramihang dinudukot at pinagpapatay ang di armadong mga aktibista sa larangang ligal.

Ilampung libong mamamayan na ang nabiktima ng pamamaslang, pagtortur, pambobomba, pananakot, blokeyo sa pagkain at kabuhayan, sapilitang ebakwasyon at iba pang karumal-dumal na paglabag sa karapatang-tao laluna sa mga pinaghihinalang base ng Bagong Hukbong Bayan (BHB).

Mula 2002 ay matatag na nilalabanan na ng BHB ang Oplan Bantay Laya. Patuloy ang pag-igting ng mga taktikal na opensiba ng BHB kung saan nagagapi at pinipinsala nito ang mga yunit ng AFP at PNP. Gayon na lamang ang paghadlang at paggapi ng BHB sa Oplan Bantay Laya sa larangan ng armadong labanan. Sa desperasyon, pinatitindi ng mga duwag na pasimuno nito na sina Arroyo, mga myembro ng kanyang Cabinet Oversight Committee on Internal Security (COCIS) at mga sagadsaring pasistang heneral tulad ni



Jovito Palparan at kanilang mga galamay ang pagtarget sa mga di armadong ligal na kalaban ng rehimeng Arroyo.

Ang tumitinding pagtarget sa daan-daang lider ng mga grupong *party list*, aktibista ng mga organisyong masa, tagapagtaguyod ng karapatang-tao, abogado, pari at pastor, mamamahayag at iba pa ay malinaw na tanda ng kainutilan ng AFP at iba pang armadong galamay ng estado na hanapin at gapiin ang BHB.

Hinding-hindi mapahihintulutan ng mamamayan at mga rebolusyonaryong pwersa na magpatuloy ang

Mga tampok sa isyung ito...

Paglaban ng mga anti-Arroyong grupo sa AFP at PNP
PAHINA 5

Mga doktor at nars, umaagos palabas ng bansa
PAHINA 8

Panggegera ng Israel sa Lebanon at Palestine
PAHINA 12

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*